

La gripa dils anno 1918

La gripa dils anno 18 ha era tuccau la Val Tujetsch. Dus giuvens schuldai ein morts e quei onn ha la pleiv satrau 25 personas. 10 mieran da malcostas, 8 dalla gripa, 2 da fleivlezia da vegliadetgna, 3 dil magun, in da apoplexia (aua) e l'auter entras ina inflimaziun dil tschurvi. Da quei 19 femnas e 6 umens.

La gripa ei enconuschenta cul num «Gripa spagnola». La gripa ei stada ina pandemia, ha cuzzau denter 1918 e 1920 ed ha custau a 25 milliuns carstgauns la mort. Auters tschontschan novissimamein dil dubel, pia 50 milliuns. La pandemia ei cumparegliabla culla pesta da 1348. Per Tujetsch ein las cefras buca enconuschentas. Pli sgarscheivlas ein las unfrendas dallas pestas dil 16avel tschentaner en Tujetsch; las cronicas plaidan da 1600 personas e quei enteifer 27 onns!! Las cefras ein denton da prender cun precauziun!

Ina atgnadad tut speciala da quella gripa ei che las pli biaras personas ch'ei mortas fuvan denter 20 e 40 onns. Ella ei sederasada en treis undas. La gripa ha priu sia entschatta igl avrel 1918 els foss dalla Emprema uiara mundiala. Purtau la gripa ella Europa han la schuldada americana. Naven dalla schuldada sederasa ella ella populaziun. Ella semuossa cun aulta febra, mal il tgau e mal las giugadiras. La gripa semussava era cun malcostas, ina dallas cumpticaziuns che accumpignava la gripa.

La secunda unda pren sia entschatta igl atun 1918. Puspei gronda febra, grondas snavurs, mal il tgau e giugadiras, ferma tuos, per part era saung nas. Ei deva pazients cun fleivels simtoms e che serevegnevan senza cumpticaziuns; auters murevan enteifer uras. Survivents fuvan per jamnas fetg staunchels e sutaposts a depressiun. Quella sa vegnir numnada sco la pli ferma unda dalla gripa spagnola.

La tiarza unda entscheiva cugl onn 1919. Ella ha plitost furiau en autras parts dil mund. Ella vegn era numnada la postpandemia – quella suenter.

Grischun

El Grischun tucca l'epidemia da 1918 treis gadas dapli femnas che umens e 4 ga dapli mortoris tiels uemns denter 20 e 29 onns ch'en la media annuala. La conseguenza ei stada ina sminuaziun dallas naschientschas. Las letgs denton ein carschidas. Il motiv ei ch'ils mortoris en loghens agricols han levgiu la sorprendida da beins purils ed ascha levgiu la fundaziun da famiglias. La mortalitad ei fetg differenta ellas parts dil cantun. Il district Mustér semuossa cun ina dallas aultas mortalitads, numnadamein 41%. Igl onn 1918 mieran el Grischun 753 personas dalla gripa.

La cauma

Il 11 da november 1918 vegn la cauma generala svizra proclamada. Il regiment grischun 36 vegn clamaus per defender la cauma. Il battagliun 91 survegn siu pensum a Cuera e procura leu per ruaus. Il 22 battagliuns 92 e 93 vegnan dislocati ella Bassa. Il 23 onns d'uiara mieran intraglauter 6 schuldai ad onn, igl onn 1918 mieran 62 umens. La cumulaziun da tensiuns politicas, miseria sociala e periclitaziun dalla snadad, gie schizun prighel da mort schaijan dapi il november sco in carpun sill'olma dalla populaziun. Cugl armistezi dils 14 da november secalma la situaziun buca da num, anzi, il cuntrats denter dretg e seniester tussegan l'atmosfera politica. Il 23 problems che vevan menau alla cauma restan.

Dus schuldaus tujetschins

Da Tujetsch piardan dus schuldaus la veta entras la gripa. Il Cristian Gieriet, naschius 1893, morts cun 25 onns. El era feagl da Rest Antoni Gieriet (1862-1943) e Barla Catrina Monn (1857-1916); l'auter ei Gion Ludovic Venzin, naschius 1894, morts cun 24 onns, feagl da Giusep Flurin Venzin (1866-1944) e Maria Gada Pally (1869-1944)




Cristian Gieriet



Gion Ludovic Venzin

En Tujetsch

Il suandont diagram muossa ils mortoris denter 1910 e 1930. La media dils mortoris da quels 21 onn ei 14.4 ad onn. En egl crodan ils onns 1918 e 1920. Mo era ils onns 1910 ed 11 fuvan stai onns cun fetg bia mortoris. Ei deva adina puspei onns cun grippas nauschas che alzavan il diember da morts. Igl onn 1911 ei quei tgunsch stau il cass cun la mort da 7 affons e 10 persunas sur 70 onns. Igl onn 1918 dumbra ils biars morts da quels 21 onn; quei ei d'atribuir oravontut als 6 affons, tut buobas ed allas 13 femnas ch'ei mortas quei onn e buca exnum alla gripa dils anno 1918.



Survesta

Onn	Diember	umens	femnas	Vegliadetgna				
				-10 onns	10 - 30	30 - 50	50 - 70	70 -
1910	19	10	9	6			5	8
1911	22	8	14	7		2	3	10
1912	18	10	8	5			4	9
1913	16	6	10	4		3	4	5
1914	12	5	7	2		1	4	5
1915	13	8	5	6		1	3	3

1916	7	2	5	1			3	3
1917	19	9	10	7	1	1	6	3
1918	25	6	19	6	5	5	6	3
1919	9	4	5	5		2		1
1920	20	10	10	9	1		4	6
1921	14	7	7	4		1	3	6
1922	11	9	2	3			3	5
1923	14	9	5	6		2	1	5
1924	13	6	7	3	1	3	1	5
1925	17	7	10	5	1	3	4	4
1926	12	5	7	2	2		4	4
1927	14	8	6	6	1	1	4	1
1928	10	5	5	4		1	1	4
1929	7	4	3	3			2	2
1930	10	4	6	1			2	6
Total	302	143*	160	99	12	26	67	98

*Ils Inafns (affon) ein buca adina menziunai cul num da batten, quei vul dir els ein morts senza batten e perquei buca d'eruir la schlatteina e quels hai quintau tiels umens, en tut ein quei 17.

La pli veglia persuna da quels onns ei vegnida 96 onns 3 meins e 18 dis, la Maria Mengia Fry-Schmid da Cavorgia ch'ei morta da fleivlezia da vegliadetgna. Dil reminent, la media digl entir 19avel tschentaner ei 11.5!

Ils morts digl onn 1918

Anna Maria Schmid (2 meins), Catrina Cavegn (7 meins), Barla Catrina Gamboni (13 meins), Maria Agnes Venzin (1 ½), Maria Giuanna Monn (3), Maria Johanna Venzin (3), Maria Barbara Curschellas (24), Maria Lucia Riedi (24), Gion Ludovic Venzin (24), Cristian Gieriet (25), Maria Cresenzia Soliva-Bearth (27), Rosa Martina Maissen (34), Maria Augustina Schmid (36), Margreta Cristgina Hendry (38), Maria Ursula Berther (48), Tresa Genoveva Giger (52 onns), Maria Margreta Jacomet (56), Gion Battesta Giger (57), Maria Favorita Schmid (62), Barla Turtè Jacomet (62), Maria Lucia Curschellas (66), Duri Vigeli Schmid (67), Barbara Vigeli Giusep Werth (71), Maria Librata Jacomet (75), Gion Antoni Beer (79).

Recepts da nossas basattas e tattas pils differents mals en general

L'entschatta da mal il culiez sgrughigliar cun aua da sal ni te da salvgia.

Metter tschaguola freida entuorn culiez en in piez fin.

Fuva era bien mettel per mal las ureglias ed era per metter sil pèz encunter la tuos.

Sitgets cun en pulenta fuva medemamein in bien mettel per la tuos cun scaldar el e metter sil pèz.

Per la febra metter piazza bletscha entuorn ils peis e gie buca ir ordaviert ni a scola cun febra.

Pasta da raischa, ni raischa, vegneva scaldada e messa si tenor il liug dil mal. Aschia per las costas, il dies e las combas. Vegneva era bugen duvrau pils animals, principalmein per las cauras.

Raischa largeda, la raischa cotschna e biala era buna da smugliar, empau sco il slogn dad oz.

Raischa ruha vegneva duvrada per desinfectar. Ella vegneva messa en in cup da metal cun burnida, cumbinau cun geneivra e ragisch rena. Ussa vegneva iu per l'entira casa, oravontut en las stanzas da durmir. Lu setschentava il cup sin meisa en stiva ni cuschina e barschava

leu a fin.

In sitget da semglin scaldau surveva per metter sil venter, sil pez e sillas costas.

Igl ieli semglin fuva buns per unscher empau dapertut.

Per mals dil pèz vegneva fatg beiber bia te il malsaun; aschia tè da feglia magnucca ni da fenichel e curetg.

Curetg surveva era fetg bein per mal il magun.

Pil magun surveva era ieli d'arbagias. Quel vegneva cumpraus e veva ina colur verda.

Agl vegneva smugliaus e buca ruis en bucca. Cun agl en in sitget entuorn culiez vegneva era iu a scola.

Vinars d'ansauna fuva in mettel preferiu dils carschi.

La ragisch rena vegneva mustigiada encunter mal ils dents.

Da gliez temps stueva il miedi vegnir en da Mustér. Con ditg quei saveva cuzzar sa mintgin supponer. Cu ei mava propi buca bein ed ins temeiva il mender, vegneva il plevon clamaus en casa.

Fontaunas

Archiv communal Tujetsch

Biblioteca documentara Archiv communal Tujetsch

Cecilia Hendry-Schmid